



Ministère de l'Agriculture, de la Viticulture et du Développement rural,	8
Référence: 720/22	
15 NOV. 2022	
A traiter par:	
Copie à:	

**Här Fernand Etgen**  
**President vun der Chamber**

Lëtzebuerg, de 15. November 2022

Här President,

Esou wéi den Artikel 80 vum Chambersreglement et virgesäit, bieden mir Iech, dës parlamentaresch Fro un den Här Landwirtschaftsminister weiderzeleeden.

Den 10. November sinn sech d'Europaparlament an de Ministerrot virleefeg eens ginn, fir den Netto-Ofbau vun CO<sub>2</sub> duerch natierlech Senken (puits naturels) bis 2030 op 310 Milliounen Tonnen CO<sub>2</sub>-Equivalenten eropzesetzen, dat virum Hannergrond vum Ziel vun der Klimaneutralitéit an der EU bis 2050. Wéi d'EU-Kommissioun an hirem Kommuniké vum 11. November matdeelt, sinn d'EU-Länner dowéinst elo ugehalen, hir national Strategiepläng am Kader vun der Gemeinsamer Agrarpolitik unzepassen. An deem Kontext wollte mir folgend Froen un den Här Landwirtschaftsminister stellen.

- Wat bedeit dësen Accord téschent dem Europaparlament an dem Ministerrot konkret fir Lëtzebuerg?
- Muss de nationalen Strategieplang wéinst dem Accord elo ugepasst ginn?
  - Wa jo, wat wäert sech änneren?
  - Wa jo, huet dat och Auswierkungen op dat neit Agrargesetz, dat am Moment ausgeschafft gëtt?

Här President, mir bieden Iech, eisen déifste Respekt unzehuelen.

**Martine Hansen**

**Deputéiert**

**Octavie Modert**

**Deputéiert**



**Gemeinsam Äntwert vun der Ministesch fir Ëmwelt, Klima an nohalteg Entwécklung an dem Minister fir Landwirtschaft, Wäibau a ländlech Entwécklung op d'parlamentaresch Fro n°7180 vum 15. November 2022 vun den éierwäerten Députéierten Madamm Martine Hansen a Madamm Octavie Modert iwwert "Impact de l'accord sur les puits de carbone"**

Den 11. November hunn d'Europaparlament, de Ministerrot an d'Kommissioun ee provisoreschen Accord zu der Reglementsproposé, fir de Bäitrag vum Sektor "Landnotzung, Landnotzungsännerungen a Forstwirtschaft (LULUCF)" zu de verschäerften Klimaziler vun der EU fir 2030 ze stäerken, fonnt.

Dëst Reglement leet een Zil vun 310 Milliounen Tonnen CO<sub>2</sub>-Equivalent fir den Netto-Zäregasofbau am LULUCF-Sektor bis 2030 fest. Konkret heescht dëst datt d'Späicherung vun CO<sub>2</sub> an de Bëscher souwéi am Buedem an der EU bis 2030 op 310 Milliounen Tonnen pro Joer muss verbessert ginn. Et gëllt also den aktuellen europawäiten Trend, deen a Richtung vun dem Ofhuelen vun de Kuelestoffsénke geet, ze inverséieren.

Dat Gesamtzil fir d'EU gëtt ënner Form vu verbindlechen nationalen Ziler op d'Memberstaaten erofgebrach. Lëtzebuerg ass domat gehalen seng Kuelestoffsénken vun duerchschnëttlech 376.000 Tonnen CO<sub>2</sub>-Equivalent an de Joren 2016 – 2018 ëm 27.000 Tonnen op 403.000 Tonnen CO<sub>2</sub>-Equivalent am Joer 2030 ze verbesseren.

Dofir mussen an éischer Linn d'Kuelestoffspäicher an eise Bëscher duerch eng klimagerecht Gestiouen erhalen an zousätzlech gestärkt ginn. Nieft Reegelen fir de Schutz vun de Bëscher, stinn Hëllefregimer bereet fir eng nohalteg an naturno Gestiouen vun de Bëscher finanziell z'ënnerstëtzen a fir esou hir Resilienz a Kuelestoffspäicherkapazitéit ze erhéijen. Ervierzehewen ass dobäi de "Klimabonus Bësch", deen sech u privat Bëschbesëtzer riicht (*Règlement grand-ducal du 16 avril 2021 instituant une prime pour la fourniture de services écosystémiques en milieu forestier*), an de *Règlement grand-ducal du 3 mars 2022 instituant un ensemble de régimes d'aides pour l'amélioration de la protection et de la gestion durable des écosystèmes forestiers*. Den Naturpakt (*Loi du 30 juillet 2021 portant création d'un pacte nature avec les communes*) guidéiert d'Gemengen an hiren Efforten d'Kuelestoffspäicher op hirem Territoire ze stäerken.

Donieft gëllt et och eis Biedem als Kuelestoffspäicher ze notzen. An deem Sënn bidde landwirtschaftlech Flächen e wichteg Potential. Vum agronomesche Standpunkt hier gesinn, enthalen de nationale Strategieplang an d'Agrargesetz wichteg Instrumenter fir d'Späichere vun Kuelestoff an der Landwirtschaft ze förderen. Fir just e puer Aspekter ze nennen, kéint ee folgend Themen opgräifen:

- Erhale vum Gréngland a weider Fërderung vum Feldfudder (temporäert Gréngland);
- Incitatiounen an Ënnerstëtzung fir net produktiv Flächen, déi awer mussen ugeséit sinn;
- Ënnerstëtzung vun Tëschefriichte fir eng Ganzjoresbedeckung vum Buedem;
- Reduzéiert Buedembearbeitung;
- Ënnerstëtzung fir den Uebstbau an d'Agroforesterie weider auszebauen.

All des Aktiounen droen derzou bei, dass de Kuelestoff entweder am Buedem oder an de Planzen ugeräichert gëtt.

Lëtzebuerg, de 14. Dezember 2022  
(s.) Joëlle Welfring  
Ministesch fir Ëmwelt, Klima an nohalteg Entwécklung